

ՕՐԱԳՐՈՒԹԻՒՆ
ԵՐԵՄԻԱ ՉԷԼԷՊԻ ՔԷՕՍԻԻՐՃԵԱՆԻ



(ՌՂԷ = 1648)

Յունիսի ամսոյ ժկ, յաւուր կիւրակէի յետ մտա-
նելոյ արեգականն ի մուտս՝ եղև յանկարծակի ճայ-
թուն մեծ և ահագին, զի թնդիւն առեալ երկիր շար-
ժեցաւ և զողալով սարսեալ երերաց քաղաքս ամե-
նայն, և նաւք ի վերայ ծովուն առ իրեարս հարեալ
մնային և ի սաստիկ բախմանէ յետս եկեալ խաղային.
զի երեք անգամ մի ի վերայ միոյ շարժեաց և հա-
զիւ դադարեցաւ սաստիկ պատիժ պատուհասին, հա-
յեցեալ ամէնողորմ Ստեղծողն յողբ և ի ճիչ տղայոց
անմեղաց և միանգամայն ամենայն սեռի:

Իսկ ահագին հրաշս այս գուշակումն եղև ար-
տաբերելի իրիս այս. զի ի զրաւել աւուրց Սէ-ից,
Յուլիս ամսոյ իէ յաւուր Ջշի(*) (27 Յուլիս) ի մէջ գի-
շերի դղրդեցաւ քաղաքս և բամք մարդկան ի մի վայր
գումարեցան՝ ուլամայք և սուլամայք, մեծամեծք և
խշխանք, զօրք և զինաւորք խորհուրդ առին ի միա-
սին սակս սպանման թագաւորին(**), առեալ Ֆէթվայ
ի մօշնայէն, որ ասեն մուհտի՝ Աբդուահիմ անուն: Եւ
ընդ լուսանալ առաւօտուն բարձրացաւ աղմուկ և
խռովութիւն յոյժ: Յայնժամ հրամայեցին վրակել

(*) Շարթուան օրերու համառօտագրութիւններն են.
Քշի = Երկուշաբթի, Գշի = Երեքշաբթի, Դշի = Չորեքշաբթի,
Եշի = Հինգշաբթի, Ջշի = Ուրբաթ:

(**) Լուսանցիւն վրայ օտար գրչէ. Սուլթան Իպրահիմ: